

## Mixed Saisonbericht

Wie alli andere au simmer ine turbulenti Saison gstartet. Villi Aspekt si unklar gsi, cha me witermache? Wird d Saison echt wieder abbroche? Wie villi Teams ziehnd sich no zrug us dr Meisterschaft? usw.

Ich weiss no am ahfang wo es no gheisse het, dass me nit wot trainiere wenn d Maske muess ahzoge bliebe. Es het lüt ahfange mit mir über die bestimmige diskutiere obwohli au nüt chan dra ändere. Bi aktuell hüt noni mitm Herr Berset befründet.

Am endi vom Tag hend alli trotz de bestimmige gfunde, dass d Liebi zum Volleyball z gross isch um zwar ihgschränkti aber möglichi Trainings abzsege. So isch dr Trainingsbetrieb au wieder ufgnoh worde sobald mr hend dörfe.

Da d Massnahme au s läbe absits vom Volleyball betroffe hend, hend gwüssi au nit chönne sofort derbi si. Anderi hend ufgrund vom Schaffe nit immer chönne ume si. Ih dr Halle hets somit teils ziemli spärlich usgseh, aber die ahwesende hend au denn durezoge.

Mir si guet id Meischterschaft gstartet und hend au bereits die erschte Erfolg in Form vo Pünkt chönne verbueche. D Spiel si je nach Tagesform usgliche gseh und anderi hemr wiederum ohni wenn und aber gwunne.

E paar luschtigi Moment: Bim letzte mol wo mr pers. d GV gha hend hemr vom Minion verzellt wo mr als Gegner gha hend. Dismol isch es dr Vikinger gseh wo unmenschliche Ahgriff gmacht het. Und s Team vo Diegte wo fräch eusi Lückene immer usgnützt het und nur no direkt übere gspielt het. Mir hend usm Fähler glernt und für d Rückrundi einersits wege Spielermangel und fehlender erfahrig d Sandra und Nicole derzuegholt zum se schloh. Nachme gemütliche usgang vom Mixed het es öbber usm Team gschafft bim halbwegs nüchterne Zuestand heilaufe dr Fuess umzknickse und so für mehreri mönet uszfalle. Ich seg bewusst nit wer, aber mir ziehnd se au ame uf wege dem.

Bevor me zude schlächte News chömme, chani verkünde dass s Mixed ufe 2. Platz vo 7 Teams gschafft het. Eini het sich jedoch zrugzoge gha. Somit simmer wieder zrug ih dr 3. Liga. Nach eus hätts eig nit miesse si, aber dr Vikinger isch au ufgstiege drum hemr nochezoge füre Revanche.

Leider verlönd eus füre Moment sicher zwei Spielerinne s Team. Aber vlt finde sie jo bald oder einisch au mol wieder dr Weg id Halle als Zueschauer oder Spieler.

Kurz nach dr Saison het sich leider ei Spieler bimene Uswärtsturnier s chnü verdreht und derbi hets Miniskus und Chrüzband miesse dra glaube. Erholigsphase duuret sicher 4 mönet bis me wieder chan spiele. Aber er isch wieder guter Dinge und mir hoffe alli dass er sich schnäll und guet chan erhole denn vo dr OP. Gemäss minere Statistik liebt er s Volleyball am meischte wenn me nach dr aweseheit ide Trainings goht. Er isch nemli am meischte ume gsi und zwar vo 38 Trainings ganzi 35 mol.

Z letzt würdi mi gern no bim Team bedanke. Es isch nit immer eifach gseh mit de Umständ und vlt au mir als Trainer. Dir heit alli guet mitgmacht, au wenn dr eint oder ander het wieder miesse motiviert werde id Halle z cho. So bini doch im grosse und ganze sehr zfriede mit dr leischtig und dem wo mr als Team erreicht hend und au no 2 Dame mehr usm Dame 2 sich zu eus getraut hei. Mir freue eus ufe gueti und lustigi Saison.

Thushi